

四庫全書

史部

欽定四庫全書

蜀中廣記卷三十九

明 曹學佺 撰

邊防記第九

下川東道

石砮宣撫司

秦屬黔中郡漢置牂牁郡晉析為夜郎郡寰宇記夜郎郡
有且蘭縣漢武時使發南夷兵征南越且蘭不從乃反漢發巴



蜀校尉擊破之遂平南夷以為牂牁郡樂史註云今涪州之義泉郡也後周於石砭地置施州唐改為清江郡方輿勝覽施州東晉末旦元誕竄太陽蠻中築城臨施水號施王城子孫襲王至後周保定初平之以其地置施州而清江郡隸焉州乃施王之餘址故以為名尋改為亭州又改為庸州又為清江郡恭帝復置施州土夷攷唐改施州為清江郡宋改清江為南賓縣按唐武德二年分浦州武寧縣西界置南賓縣屬忠州也武寧今改巡檢司在司北百里外 志云司

東北百四十里有山形如張蓋俗曰石涼傘即石幢之
說也按寰宇記牂州有建安縣漢牂牁郡也有高連石
門四十九頭木瓜諸山有古牂牁郡城華陽國志云牂
牁郡上當天井故多雨潦今有古城在郡西即漢天復
之時所保於此有石潼關華陽國志云且蘭縣西南有
地名石潼關柱蒲關漢書亦云牂牁郡有柱蒲關石砮
之名本此 志云司治南百五十里大峯門山兩崖壁
立中通行人有古壘按方輿勝覽東門山在歌羅寨西

北五十里東即夜郎故地古來夷夏分界入貢之門戶也又云竹主祠在歌羅寨西北五十里東門山崇寧間賜靈惠廟額歌羅寨本夜郎縣唐置珍州乾德四年蠻酋珍州刺史田景遷內附納土以酉江為界自是酉江以北所謂夜郎縣故地盡入施州矣竹王即夜郎侯也勝覽又云施州驛北有馬公泉未詳志云司西北二百里外有馬頭山山頂有馬黃廟祝馬伏波黃山谷處蓋山谷入黔州安置取道施州故人慕而祠之其封域

東至黔江縣界二百里西至酆都縣界南至武隆縣界
各百七十里北至忠州界百二十里編戶三里其民悍
而好鬪兵馬稱強間有所調遣輒踴躍趨赴與地紀勝
云施之地雖雜夷落猶近華風故鄉音則蠻夷巴漢言
語相混其山岡砂石不通牛犂唯伐木燒畬以種五穀
隆冬可單盛夏可袂矣 方輿考云施州蠻者夔路徼
外熟夷蓋唐彭水蠻也咸平中施蠻嘗入寇詔以鹽與
之且許其以粟轉易蠻大悅自是不為邊患後因饑又

以金銀倍實直質于官易粟官不能禁熙寧六年詔施
州蠻以金銀質來者估實值加七年不贖則變易之著
為令熊本經制洧井事蠻酋田現等內附施黔比近蠻
子弟精悍戰鬪趨捷朝廷嘗團結為義勝軍其後瀘州
洧井石泉蠻叛皆獲其用 夢溪筆談忠萬間夷人祥
符中嘗寇掠邊臣務懷來使人招其酋長祿之以券粟
自後有效而為之者不得已又以券招之其間紛爭者
至有自陳其人纔殺掠人遂得一券凡殺兵民倍之互

相計較為寇甚者則受多券熙寧中會之前後凡計四百餘券子孫相承世世不絕因其為盜悉誅鋤之罷其舊券一切不與自是夷人畏服不復犯塞 渝州志云

宋景定中蠻酋大蟲馬什用同向士壁率師大敗元兵繼平九溪洞夷授鎮國上將軍領銅牌鐵印石砭安撫司大使世守其土元改石砭軍民府尋陞安撫使司後以生夷作亂為定虎什用獲受賞改陞石砭宣撫使司明玉珍僭據時為先納牌印授石砭安撫司國朝洪武

七年克復安撫使馬克用出降次年陞石砭宣撫管轄
土民世襲隸重慶嘉靖四十二年改隸夔州 土考

云施州忠路安撫司本石砭馬氏姻戚因爭邊界構殺
不休蓋馬氏內不和於妻子外不睦於族人讐殺訐奏
動尋干戈非一日矣近又與其同知陳思虞訐奏繫夔
獄中未結 經畧志云重夔二府所轄播酉石砭等土
司及黔江武隆彭水忠涪建始奉節巫山雲萬等十州
縣皆稱關徼與湖廣施州衛所轄散毛施南唐崖忠路

忠建忠孝容美等土司之地鷄鳴相聞犬牙交制弘治
元年於達州設兵備副使統轄重夔黔江等地及湖廣
瞿塘施州等衛所正德間監鄢作亂調各土司征勦因
而覘知蜀道險易居民村落不時出没行劫施衛官旗
貪其子女財帛之遺相與表裏為姦違例婚媾故諸夷
得逞焉嘉靖十年於黔江千戶所散毛宣撫司中界設
立老鷹等三關五堡二十年川湖會題設九永守備官
一員於施衛駐劄俾其約束兩省徼上夷司川湖守巡

得胥節制之 北史後周恭帝二年巴西人譙淹扇動

羣蠻以附梁蠻帥向鎮侯向白虎等應之向五子王又
攻陷信州田烏度田唐等抄斷江路文子榮復據荊州
之政陽郡自稱仁州刺史并隣州刺史蒲微亦舉兵逆
命詔田弘賀若敦潘和李遷哲等討破之周武成初文
州蠻叛州軍討定之尋而冉令賢向五子王等又攻陷
白帝殺開府楊長華遂相率作亂前後遣開府元契趙
剛等總兵出討雖頗翦其族類而元惡未除天和元年

詔開府陸騰督王亮司馬裔等討之騰水陸俱進次于湯口先遣喻之而令賢方增浚城池嚴設扞禦遣其長子西恭次子南王領其支屬於江南險要之地置立十城遠結涔陽蠻為其聲援令賢率其卒固守水邏城騰乃總集將帥謀進趣咸欲先取水邏然後經畧江南騰言於衆曰令賢內恃水邏金湯之險外託涔陽輔車之援兼復資糧充實器械精新以我懸軍攻其嚴壘脫一戰不剋更成其氣不如頓軍湯口先取江南剪其毛羽

然後遊軍水邏此制勝之計也衆皆然之乃遣開府王亮率衆渡江旬日攻拔其八城凶黨奔散獲賊帥冉公并生口三千人降其部衆一千戶遂簡募驍勇數道分攻水邏路經石壁城險峻四面壁立故以名焉唯有一小路線梯而上蠻蜚以為峭絕非兵衆所行騰被甲先登衆軍繼進備經危阻累日乃得舊路且騰先任隆州總管雅知其路蠻帥冉伯犂冉安西與令賢有隙騰乃招誘伯犂等結為父子又多遺錢帛伯犂等悅遂為

鄉導水邏側又有石勝城者亦是險要令賢使其兄龍
真據之騰又密告龍真云若平水邏使其代令賢處之
龍真大悅遣其子詣騰乃厚加禮接賜以金帛蠻貪利
既深仍請立効乃謂騰曰欲翻所據城恐人力寡少騰
許以三百兵助之既而遣二千人銜枚夜進龍真力不
能禦遂平石勝城晨至水邏蠻衆大潰斬首萬餘級令
賢遁走而獲之司馬裔又別下其二十餘城獲蠻帥并
三公等騰乃積其骸骨於水邏城側為京觀後蠻蜚望

見輒大哭自此狼戾之心輟矣時向五子王據石墨城令其子寶勝據雙城水邏平後頻遣喻之而五子王猶不從命騰又遣王亮屯牢坪司馬裔屯雙城以圖之騰慮雙城孤峭攻未可拔賊若委城遁散又難追討乃令諸軍周迴立柵遏其走路賊乃大駭於是縱兵擊破之禽五子王於石墨獲寶勝於雙城悉斬諸向首領生禽萬餘口信州舊居白帝騰更於昭烈故宮城南八陣之北臨江岸築城移置信州又以巫縣信陵秭歸並築城置

防以為襟帶焉天和六年蠻渠冉祖意冉龍驤又反詔
大將軍趙閭討平之自此羣蠻懼息不復為寇

蜀中廣記卷三十九

欽定四庫全書

蜀中廣記卷四十

明 曹學佺 撰

邊防記第十

川北

板楯蠻

華陽國志秦昭襄王時白虎為害自秦蜀巴漢患之秦
王乃重募國中有能煞虎者邑萬家金帛稱之於是夷

眀聰廖仲藥何射虎秦精等乃作白竹弩於高樓上射虎中頭三節白虎常從羣虎瞋恚盡搏煞羣虎大响而死秦王嘉之曰虎歷四郡害千二百人一朝患除功莫大焉欲如要王嫌其夷人乃刻石為盟要復夷人頃田不租十妻不筭傷人者論煞人者顧死俸錢盟曰秦犯夷輸黃龍一雙夷犯秦輸清酒一鍾夷人安之漢興與閩中范目從高祖定秦有功高祖因復之專以射白虎為事戶歲出寶錢口四十故世號白虎復夷一曰板楯

蠻今所謂弱頭虎子者也順桓之世板楯數反太守蜀
郡趙溫恩信降服於是宕渠出九穗之禾胸臆有連理
之木光和二年板楯復叛攻害三蜀漢中州郡連年苦
之遣御史中丞蕭瑗督益州兵討之連年不克天子欲
大出軍時征役疲弊問益州計曹考以計畧益州計曹
掾程包對曰板楯七姓以射白虎為業立功先漢本為
義民後除徭役但出實錢口歲四十其人勇敢能戰昔羌
數入漢中郡縣破壞不絕若線後得板楯來虜彌盡號

為神兵羌人畏忌傳語種輩勿復南行後建寧二年羌復入漢牧守遑遑復賴板楯破之若微板楯則蜀漢之民為左社矣前車騎將軍馮緄南征雖授丹陽精兵亦倚板楯近益州之亂朱龜以并涼勁卒討伐無功太守李顥以板楯平之忠功如此本無惡心長吏鄉亭更賦至重僕役過於奴婢箠楚隆於囚虜至乃嫁妻賣子或自剄割陳寃州郡牧守不理去闕庭遙遠不能自聞含怨呼天叩心窮谷愁於賦役困乎刑酷邑役相聚以致

叛戾非有深謀至計僭號不軌但選明能牧守益其資
穀安便賞募從其利隙自然安集不煩征伐也昔中郎
將尹就伐羌擾動益部百姓諺云寇來尚可尹將殺我
就徵還後羌自破退如臣愚見權之遣軍不如任之州
郡天子從之遣太守曹譙宣詔降赦一朝清戢按此蠻
北道巴渠間常有之 寰宇記云漢末天下亂自巴西
之宕渠遷于漢中楊車坂抄掠行旅號為楊車巴魏武
剋漢中李特祖將五百家歸之魏武又遷于略陽北復

號之為巴氏也 後漢書云板楯蠻其在黔中五溪長沙間則為盤瓠之後其在峽中巴梁間則為廩君之後按杜光庭錄異記李特字元休廩君之後昔武落鍾離山崩有石穴二所一赤如丹一黑如漆有人出於赤穴者名務相姓巴氏有出於黑穴者凡四姓皐氏樊氏栢氏鄭氏五姓偕出爭長於是務相約以劍刺穴能著者為廩君四姓莫著而務相之劍懸焉又以土為船雕畫之而浮水中曰若其船浮者為廩君務相船又獨浮於

是遂稱廩君乘其土船將其徒卒當夷水而下至於鹽
陽鹽水神女子止廩君曰此魚鹽所有地又廣大與君
俱生可止無行廩君曰我當為君求廩地不能止也鹽
神夜從廩君宿旦輒去為飛蟲諸神皆從其飛蔽日廩
君欲殺之不可別又不知天地東西如此者十日廩君
即以青縷遺鹽神曰嬰此宜之與汝俱生不宜將去汝
鹽神受而嬰之廩君至碣石上望膺有青縷者跪而射
之中鹽神鹽神死群神與俱飛者皆去天乃開玄廩君

復乘土船下及夷城夷城石岸曲泉水亦曲望之如穴
狀廩君歎曰我新從穴中出今又入此奈何岸即為推
廣三丈餘階級相承廩君登之岸上有平石長五尺方
一丈廩君休其上投策計算皆著石焉因立城其旁而
居之其後種類遂繁秦并天下以為黔中郡薄賦歛之
歲出錢四十萬巴人呼賦為賓因謂之賓人也王維送
李梓州詩賓女輸幢布本此獠蓋南蠻之別種初出自
梁邑之間自漢中達于邛笮川洞之間所在皆有俗多

不辨姓氏又無名字往往推一酋帥為主亦不能遠相
統攝父死則子繼若中國之貴族也獠王各有鼓角一
雙使其子弟自吹擊之按蜀本無獠李勢時諸獠始出
巴西渠川廣漢陽安資中犍為梓潼山谷間十餘萬落
攻破郡縣為益州大患自桓元子破蜀之後力不能制
又蜀人東流山險之地多空獠遂挾山傍谷與夏人參
居近者頗輸租賦在深山者仍不為編戶至梁武帝梁
益二州歲歲伐獠以自裨潤公私頗藉為利後魏正始

初梁將夏侯道遷舉漢中附魏魏遣尚書邢巒為梁益
二州刺史以鎮之其後以梁益二州控攝險遠乃立巴
州以統諸獠後以巴首帥嚴始興為刺史又立隆城鎮
管獠二十萬戶所謂北獠是也歲輸租布魏明帝孝昌
中據城叛梁益二州遣將討之攻陷巴州執始興斬之
後梁益入梁自此又屬梁矣後周武帝平梁益之後令
所在撫慰其與華人雜居者亦頗從賦役然天性暴亂
旋致擾動每歲命隨近州鎮出兵討之獲其人以充賤

隸謂之壓獠焉復有商旅往來亦資以為貨公卿逮於
民庶之家有獠口者多矣然其種類滋蔓保據巖壑依
林走險若履平地性又無知殆同禽獸諸夷之中最難
以道義招懷也依樹積木以居其上名曰干欄干欄小
大隨其家口之數好相殺害多仇怨不敢遠行性同禽
獸至于忿怨父子不相避惟手有兵刃者先殺之若殺
其父走避于外求得一狗以謝其母然後敢歸母得狗
謝不復嫌恨若報怨相攻擊必殺而食之遞相劫掠不

避親戚賣猪狗而已亡失兒女一哭便止親戚比隣指授相賣避賣者啼叫不服逃竄避之乃將買人捕逐若亡叛獲便縛之但經縛者即服為賤隸不敢更稱良矣執楯持矛不識方矢用竹為簧羣聚鼓之以為音節能為細布色至鮮淨大狗一頭買一生口性尤畏鬼鬼所殺之人美鬚髯者必剝其面皮籠之于竹及燥號之曰鬼鼓舞祀之以求福利俗尚淫祀至有賣其昆季妻孥盡者乃自賣以供祭焉鑄銅為器大口寬腹名曰銅爨

甚薄且輕易于熟食酉陽雜俎獠婦七月生子死則豎棺埋之木耳夷舊牢西好鹿角為器其死則屈而燒之埋耳後小骨類人黑如漆小寒則梧沙自處但出其面焉續博物志曰寧國論云蜀中本無獠晉末李雄之亂山谷洞中壤壤而出轉轉漸大自為夫婦而益多夫土乾則生蚤地濕則生蚊積穀則生蠹腐肉則生蛆蛆化為蠅蠅又自生蛆蛆又自生蠅豈有窮乎

蜀中廣記卷四十

欽定四庫全書

史部

蜀中廣記卷四十一

詳校官編修臣翟槐

編修臣程嘉謨覆勘

總校官庶吉士臣何思鈞

校對官學正臣陳木

謄錄舉人臣曹勲祖

欽定四庫全書

蜀中廣記卷四十一

明 曹學佺 撰

人物記第一

川西道屬

成都龍安二府

周

長弘資中人事劉文公為其屬大夫孔子嘗問樂焉敬

王元年王居狄泉謂之東王時南宮極震弘謂文公曰
君其勉之先君之功可濟也周之亡也其三川震今西
王之大臣亦震是天棄之矣東王必克初晉趙氏范氏
不相能而范氏劉氏世為婚姻萇弘事劉文公故周與
范氏二十八年趙鞅以為討於是周人殺弘以謝之藏
其血於地三年化為碧按封禪書曰萇弘以方事周
靈王時諸侯莫來朝周周力少弘乃明鬼神之事設射
狸首狸首者諸侯之不來也弘乃依物怪欲以致之諸

侯不從而晉人怒遂執殺甚弘

西漢

雍齒什邡人初從趙王後從楚王素窘辱高祖晚乃從漢戰滎陽京索俱有大功而高祖終憾之不寘天下既平上大封功臣其未封者日夜爭功不決上在雒陽南宮從複道望見諸將往往相與沙中偶語上曰此何語留侯曰不知乎此謀反耳上曰天下屬安定何故反留侯曰陛下起布衣以此屬取天下今為天子而所封者

皆蕭曹故人與所親愛所誅者皆生平仇怨今軍吏計功以天下不足徧封此輩畏陛下不能盡封又見疑平生過失故相聚謀反耳上乃憂曰為之柰何留侯曰上生平所愠羣臣所共知誰最甚者上曰莫如雍齒與我故怨又數窘辱我我欲殺之為其功多故不忍留侯曰今急封雍齒以示羣臣羣臣見雍齒封人人自堅矣上乃封雍齒什邡侯而急趣丞相御史大夫定功行封羣臣以什邡侯封賜宴罷酒皆喜曰雍齒尚侯我屬無患矣

張寬字叔文成都人景帝時文翁為蜀郡守遣寬詣博士東受七經還以教授於是蜀學比齊魯武帝時寬從郊甘泉泰畤過橋見一女子裸浴川中乳長七尺帝使問之言後七車知我適得寬車對曰天有乳星主祭祀不齋潔則見女形帝乃感悟以為揚州刺史世稱為七車張

嚴遵字君平綿竹人性至孝澹泊寡欲明經博古尤精於易文章弘贍以著述為事不就徵辟杜陵李強為益

州刺史謂遵弟子揚雄曰吾真得君平矣雄曰君但可見不能屈也強不以為然至州修禮交遵遵始見之強服其清高竟不敢屈遵隱於成都卜肆有問卜者即知其人心術之隱隨其所問引之忠孝仁義日閱得百錢足具朝暮餽即垂簾焚香靜坐注老子周易以此為常初博望侯張騫使大夏窮河源歸舟中載一大石以示君平君平咄嗟良久曰去年八月有客星犯牛女意者其君乎此織女支機石也博望侯曰然吾窮河源至一

處見女子織錦丈夫牽牛吾問此何地女子答曰此非
人間也何以到此因指一石曰吾以此石寄汝舟上汝
還以問蜀人嚴君平必為汝道其詳君平曰吾怪去年
客星入牛女乃汝乘槎已到日月之旁矣遂相與詫異
人乃始知成都卜肆中者非常人也年九十卒揚雄稱
之曰不慕夷即由矣不作苟見不治苟得久幽而不改
其操雖隨和何以加諸

司馬相如字長卿成都人少時好讀書學擊劍其親名

之曰犬子讀蘭相如傳慕其為人乃更名相如以貲為郎事孝景帝為武騎常侍非其好也會景帝不好辭賦是時梁孝王來朝從游說之士齊人鄒陽淮陰枚乘吳莊忌之徒相如見而悅之因病免游梁梁孝王命與諸生同舍相如得與諸子居數歲乃著子虛之賦孝王卒相如歸家貧無以自業素與臨邛令王吉善吉曰長卿久宦遊不遂而來過我於是相如往舍都亭臨邛令謬為恭敬日往朝相如相如初尚見之後稱病使使者謝

吉吉乃愈益謹肅臨邛多富人而卓王孫至有家僮八百人程鄭至數百人二人乃相謂曰今有貴客為具召之并召令令既至卓氏客以百數至日中謁司馬長卿長卿謝病不能往臨邛令不敢嘗食自往迎相如相如不得已強往一坐盡傾酒酣臨邛令前奏琴曰竊聞長卿好之願以自娛相如辭謝鼓一再行是時卓王孫有女文君新寡好音故相如謬與令相重以琴心挑之相如之在臨邛從車騎雍容閒雅甚都及飲卓氏弄琴文

君竊從戶牖窺之心悅而好之恐不得當也既罷酒相如乃使人厚賜文君侍者通殷勤文君夜亡奔相如相如乃與馳歸家徒四壁立卓王孫大怒曰女至不才我不忍殺不分一錢也或諫王孫王孫終不聽文君久在成都相如病甚文君曰長卿弟俱如臨邛從昆弟假貸猶足為生何至自苦如此相如與俱之臨邛盡賣其車騎買一酒舍酤酒而命文君當壚相如身着犢鼻褌與保傭雜作滌器於市中卓王孫聞而恥之為杜門不出

昆弟諸公更為王孫言曰有一男兩女所不足者非財也今文君已失身於司馬長卿長卿故倦遊雖貧其人材足依也且又令客獨奈何相辱如此卓王孫不得已分與文君僮百人錢百萬及其嫁時衣被財物文君乃與相如歸成都買田宅為富人居久之蜀人楊得意為狗監侍上上讀子虛賦而善之曰朕不得與此人同時哉楊得意曰臣邑人司馬相如為此賦上驚乃召問相如相如曰有是然此乃諸侯之事未足觀也請為天子

遊獵之賦上令尚書給筆札賦奏天子以為郎相如為郎數歲會唐蒙使蜀言夜郎可通即發巴蜀吏卒千人通夜郎犍中又多為發轉漕萬餘人用軍興法誅其渠帥蜀民大驚恐上聞之使相如責唐蒙因諭告巴蜀民以非上意相如還報唐蒙已略通夜郎因通西南夷道蒙發巴蜀廣漢卒數萬人治道二歲道不成士卒多物故費以巨萬計蜀民及漢用事者多言其不便是時邛笮之君長聞南夷與漢通得賞賜多多欲願為內臣妾請

吏比南夷天子問相如相如曰叩笮冉駹近蜀道亦易
通秦時常通為郡縣至漢興而罷今誠復通為置郡縣
愈於南夷天子以為然乃拜相如為中郎將建節往副
使王然於壺充國呂越人馳四乘之傳因巴蜀吏幣物
以賂西南夷相如至蜀蜀太守以下郊迎縣令負弩矢
先驅蜀人以為寵於是卓王孫臨邛諸公皆因門下獻
牛酒以交驩卓王孫喟然而嘆自以為得使女尚司馬
長卿晚而厚分與其女財與男等司馬長卿使略定西

南夷叩笏冉駹斯榆之君皆請為內臣除邊關邊關益
斥西至沫若水南至牂牁為徼通靈山道橋孫水以通
邛都還報天子天子大說後有人上書言相如出使時
受金免官居歲餘復召為郎相如口吃而善著書常有
消渴疾自與卓氏婚饒於財故其仕宦未嘗肯與公卿
國家之事每稱病閒居不慕官爵相如既病免家居茂
陵天子曰司馬相如病甚可往從悉取其書於是使諫
大夫所忠往而相如已死問其妻曰長卿固未嘗有書

也時時著書人又取去然長卿未死時為一卷書曰有
使者來以此奏之所忠得書奏於天子其書言封禪事
天子異之相如卒後五歲而封禪他所著若遺平陵侯
書與五公子相難草木篇俱未之采采其尤著於公卿
者

王褒字子淵資中人宣帝時故事講論六藝羣書博盡
奇異之好徵能為詞賦高才如劉向張子僑華龍柳褒
等待詔金馬門神爵五鳳之間天下殷富數有禎應上

頗作歌欲興協律之事益州刺史王襄欲宣風化於衆
庶聞褒有俊才請與相見使褒作中和樂職宣布詩選
童子令依鹿鳴之聲習而歌之其時汜鄉侯何武等學
成歌太學中轉而上聞宣帝召武等歌之皆賜帛謂曰
此盛德之事吾何足以當之褒既為刺史作頌又為之
傳益州刺史奏褒有軼才上乃徵褒既至詔為聖主得
賢臣頌上命與張子僑併待詔金馬門數從至獵所所
幸宮館輒為歌頌第其高下以差賜帛議者多以為淫

靡不急上曰不有博奕者乎為之猶賢乎已辭賦大者
與古詩同義小者辯麗可喜尚有仁義諷諭鳥獸草木
多聞之觀比之博奕遠矣項之擢為諫大夫其後太子
體不安苦忽忽善忘不樂詔使褒等皆之太子宫虞侍
太子朝夕誦讀奇文及所自作疾平乃歸太子喜褒所
造甘泉賦及洞簫頌諸篇命後宮貴人左右皆誦讀之
後方士言益州有金馬碧雞之寶可祭祀而致也宣帝
使褒往祠道病卒上閔惜之

何武字君公，郿人。宣帝時，天下和平，瑞應屢至。益州刺史使王褒頌漢德，作為詩歌，命諸童子共習歌之。武與焉。習成，起至京師，歌於太學。上聞之，召至宣室，聽其歌。大悅，賜武等帛，詣博士受業。治易，以射策甲科，為郎。與翟方進相友。後又舉賢良方正對策，為諫大夫。歷揚州刺史。秦劾長吏必先露章服罪，即除之，不服乃奏抵罪。九江太守戴聖治行多不法，武欲劾之。聖懼，自免。後為博士，毀武於朝廷。武不校。而聖子藏盜事發，繫廬江。聖

自以子必死武平心決之得脫聖慙服武每奏事至京
聖未嘗不造門謝恩初武為郡吏時太守何壽知武有
宰相器甚厚之後壽為大司農其兄子為廬江長史時
武奏事在京壽為具密召武弟顯及武故人酒酣以兄
子示之曰廬江長史材能驚下不為何公識拔柰何顯
等亟言之武曰刺史職在進善退惡不可有私也歲終
畢竟使廬江太守舉之而終不受親識居間也綏和元
年始為御史大夫成帝改御史大夫為大司空以武為

之封汜鄉侯食邑千戶武為人仁厚好進士獎拔人之
善為楚內史厚二龔為沛郡守厚兩唐為司隸進辛慶
忌此數人顯於世者何侯力也武為九卿時奏言宜置
三公官又與翟方進奏罷刺史更置州牧俱中時弊其
功名比薛宣而才稍不及經術正直則過之武在朝不
黨王氏與新都侯莽意相左平帝立誅董賢太后詔舉
可大司馬者大司徒孔光以下皆舉莽而武獨舉左將
軍公孫祿祿武嘗言外戚秉政幾危社稷親疏相間為

國計便故武舉祿而祿亦舉武太后疑其黨竟用莽為大司馬莽諷有司劾武祿二人皆免就國莽竟誣武以謀反武自殺天下冤之

何霸字翁君司空武兄也為郡戶曹刺史王尊將之官移諸郡不得遣迎太守惟霸白宜往太守遣霸尊大怒霸對曰太守遣霸非脩敬也以去京師久遲知朝廷起居耳尊遽下車持節對之因奇霸容止辟為別駕舉秀才為屬國中郎將霸兄弟五人皆有名

楊宣字君緯什邡人少受學於楚國王子張天文圖緯於河內鄭子侯師事楊翁叔能暢烏言長於災異教授弟子以百數成帝徵拜諫大夫帝無嗣宣上封事勸宜以定陶恭王子為太子帝從之出宣為交州牧太子即位為哀帝拜河內太守徵太倉令上宜封周公孔子後帝從之封周公孫相如為褒魯侯孔子後孔均為褒成侯又薦遼東王綱瑯琊徐吉太原郭越楚國龔勝等宜讚隆時雍平帝時命持節為講學大夫與劉歆共校書

居攝中平門生河南李吉廣漢嚴象趙翹等皆作大儒
王延世字長叔資中人建始五年河決東郡案圖緯當
有能循禹之功在資陽求之正得延世徵拜河堤謁者
治河以竹落長四丈大九圍夾小船載小石治之三十
六日堤防成帝嘉之改年曰河平封延世關內侯賜黃
金百斤

李弘字仲元成都人隱居不仕德行淳備鄉人化之揚
子雲作法言亟稱以為夷惠之儔蜀有富人見子雲貧

載米百石餉之求入其名法言中子雲拒之曰吾所稱
乃李仲元嚴君平輩君自謂操修可得同乎其人默默
而退

揚雄字子雲郫人少好學不為章句訓詁通而已博覽
無所不見為人簡易佚蕩口吃不能劇談默而好深沉
之思清靜無為少嗜慾不修廉隅以微名當世家產不
過十金空乏無擔石之儲晏如也顧常好詞賦每有作
嘗擬司馬相如以為式又怪屈原文過相如至不容作

離騷自投江而死悲其文蓋未嘗不流涕以為君子得
時則大行不得時則龍蛇遇不遇命也何必湛身哉乃
作書往往撫離騷文而反之自岷山投諸江流以弔屈
原年四十始至京師大司馬王音奇其文雅召以為門
下史薦雄待詔歲餘奏羽獵賦遷侍郎給事黃門與王
莽劉歆比肩哀帝之初又與董賢同官當成哀平間莽
賢皆為三公權傾人主所薦無不拔擢而雄三世不徙
官及莽篡位談說之士用符命稱功德獲封爵者甚衆

雄獨不侯以耆老久次轉為大夫好古樂道欲求文章
成名於後世以為經莫大於易故作太玄傳莫大於論
語作法言史篇莫善於蒼頡作訓纂箴莫善於虞箴作
州箴賦莫深於離騷反而廣之辭莫麗於相如作四賦
皆斟酌其本相與依倣而馳騁云王莽時劉歆甄豐皆
為上公莽既以符命自立欲絕其源以神前事而豐子
尋歆子棻復獻之莽誅豐父子投棻四裔辭所連及便
收不請時雄校書天祿閣上治獄使者來欲收雄雄恐

不能自免乃從閣上自投下幾死莽聞之問故乃劉棻
嘗從雄學作奇字雄不知情有詔勿問京師為之語曰
惟寂寞自投閣爰清淨作符命雄家素貧嗜酒人希至
其門時有好事者載酒餽從游學而鉅鹿侯芭常從雄
居受其太玄法言焉劉歆亦嘗觀之謂雄曰空自苦耳
今學者有利祿然尚不能明易又如玄何吾恐後人用
覆醬瓿也雄笑而不言年七十一天鳳五年卒侯芭為
起墳喪之三年

禽堅字孟由成都人父信使越雋為夷所得傳賣歷十
一種去時堅方姪六月生母更嫁堅長乃鬻力傭賃得
碧珠以贖父一至漢中三出徼外周旋萬里經六年冒
瘴毒狼虎至夷中得父相見悲感夷人哀之即將父歸
迎母共養州郡嘉之辟從事列上東觀太守王商追贈
孝廉令李苾為立碑銘祠之

劉寵字世信綿竹人明公羊春秋上計闕下除成都令
政教明肅是時諸縣難治乃換寵為郫令又換郫安漢

皆著績遷牂牁太守一馬之官居郡九年乘之而還
羅衍字伯紀成都人也為述即說述尚書解文卿鄭文
伯使諫述降漢為子孫福解鄭從之述怒閉二子於薄
室六年二子守志不回遂幽死卒衍察孝廉徵博士

王皓字子離王嘉字公卿俱江原人平帝時皓為美陽
令嘉為郎王莽篡位俱棄官西歸及公孫稱帝遣使徵
皓嘉恐其不至先繫皓妻子使人謂曰速裝妻子可全
對曰犬馬猶識主況於人乎遂自剄以首付使者述怒

誅其妻子嘉聞之嘆曰吾後之哉亦對使者伏劍死述
慙貫其孥皓子廣丁難逃匿述敗州郡察舉皆不往曰
吾不能復仇敢當世榮利耶終身不出稱為高士

侯剛字直孟章明字公孺俱繁人事平帝為郎王莽篡
位剛佯狂負木升闕號哭莽使人諭以天命剛曰漢承
堯緒其祚無窮今乃篡之豈天意乎吾寧蹈仁義而死
耳莽遂殺之章明亦自刎曰吾不忍以一身事二主也
光武帝表其義烈並歸葬之

東漢

郭賀字喬卿，雒人。初為太守黃幸戶曹。幸與漢中太守李榮俱被徵，賀勸幸行詣詔獄，自歸免榮。稽留詔殺之，由是顯名。太守蔡茂命為主簿，表賀明律令。歷荊州刺史。明帝南巡，善其治，徵河南尹，卒。賜錢三十萬。

楊終字子山，成都人。年十三已能作雷賦，通屈原七諫。章初為郡小吏，太守奇其才，遣詣京師受業，習春秋。顯宗時徵詣蘭臺，拜校書郎。建初元年大旱，穀貴，終以為

廣陵楚淮陽濟南之獄徙者萬數又遠屯絕域吏民怨
曠乃上疏曰臣聞善善及子孫惡惡止其身百王常典
不易之道也秦政酷烈違悟天心一人有罪延及三族
高祖平亂約法三章太宗至仁除去收孥萬姓廓然蒙
被更生澤及昆蟲功垂萬世陛下聖明德被四表今以
比年久旱災疫未息躬自菲薄廣訪失得三代之隆無
以加焉竊按春秋水旱之變皆應暴急惠不下流自永
平以來仍連大獄有司窮考轉相牽引掠拷冤濫家屬

徙邊加以北征匈奴西開三十六國頻年服役轉輸煩
費又遠屯伊吾樓蘭車師戍已民懷土思怨結邊域傳
曰安土重居謂之衆庶昔殷人迫遷洛邑且猶怨望何
況去中土之肥饒寄不毛之荒極乎願陛下留念省察
以濟元元書奏帝從之聽還徙者悉罷邊屯終又言宣
帝博徵羣儒論定五經於石渠閣方今天下少事學者得
成其業而章句之徒破壞大體宜如石渠故事永為世
則

王阜字世公成都人也太守第五倫察舉孝廉為重泉令有鸞鳥集於文學十餘日遷益州太守神馬出滇池河甘露降白鳥見民懷之如父母

任末字叔本繁人少習齊詩遊京師教授十餘年友人董奉德於洛陽病亡末乃躬推鹿車載奉德喪致其墓所由是知名郡辟功曹辭以病後奔師喪於道物故臨命勅兄子造曰必致我尸於師門使死而有知魂靈不慙

張霸字伯饒成都人年數歲而孝讓雖出入飲食自然合禮鄉人號為曾子七歲通春秋復欲進餘經父母曰汝小未能也霸曰我饒為之故字曰饒後就長水校尉樊儵受嚴氏公羊春秋遂博覽五經諸生孫林劉固段著等慕之各市宅其旁以就學焉永元中為會稽太守表用郡人處士顧奉公孫松等並著名稱其餘有業行者皆見擢用郡中爭勵志節習經者以千數道路但聞誦聲霸始到越賊未解郡界不寧乃移書開購明用信

賞賊遂束手歸附不煩士卒之力童謠曰棄我戟捐我矛盜賊盡吏皆休視事三年謂掾史曰太守起自孤生致位郡守蓋日中則移月滿則虧老氏有言知足不辱遂上病卒年七十遺勅諸子曰昔延州使齊子死羸博因坎路側遂以葬焉今蜀道阻遠不宜歸塋可止此葬足藏髮齒而已務遵速朽副我本心人生一世但當畏敬於人若不善加已直為受之諸子承命葬於河南梁縣將作大匠翟酺等與諸門人追錄本行謚曰文霸妻

司馬氏雒陽人既將諸子還蜀及疾革亦遺勅曰舜葬蒼梧二妃不從汝父葬洛吾自葬蜀各行其志耳時人服其達謚曰敬霸中子楷

張楷字公超亦通嚴氏春秋古文尚書門徒常百人賓客慕之父黨夙儒偕造門焉車馬填街徒從無所止黃門及貴戚之家皆起倉巷次以候過客往來之利楷輒避之家貧無以為業嘗乘驢車至縣賣藥足給食輒還鄉里司隸舉茂才除長陵令不至官隱居弘農山中學

者隨之所居成市華陰山南遂有公起市五府連辟舉
賢良方正皆不就漢安元年順帝特下詔告河南尹曰
故長陵令張楷行慕原憲操擬夷齊輕貴樂賤竄跡幽
竅高志確然獨拔羣倫前此徵命盤桓未至將主者翫
習於常優賢不足所以難歟郡特以禮發遣楷復告疾
不到性好道術能作五里霧關西人裴優亦能作三里
霧自以不如楷從學之楷避不肯見桓帝即位優遂行
霧作賊事覺被考優言從楷學術楷亦從坐繫廷尉詔

獄積二十年恒諷經籍作尚書注後以事無驗見原還家建和二年詔安車備禮聘之辭以篤疾不行年七十卒於家

李尤字伯仁雒人少以文章顯和帝時侍中賈逵薦尤有相如揚雄之風召詣東觀作辟雍德陽諸觀賦懷戎頌百二十銘政事七篇善之拜蘭臺令史稍遷諫大夫安帝時受詔與謁者僕射劉珍等共撰漢記後帝廢太子為濟陰王尤上書諫爭順帝立遷安樂相卒尤同邑

李勝字茂通亦有文才為東觀郎著詩誄論頌數十篇

賈栩字元集什邡人雖孟伯元為父復仇聞栩名往投之雒縣追伯元栩相嘆曰士以義遇我豈可倍哉然雒縣必移什邡負我君乃自殺李勝言之以方虞卿魯之朱家

姜詩字士遊雒人事母至孝母欲江水及鯉魚膾又不
能獨食須隣母共之詩嘗供備子汲江溺死秘言遣學
不使母知於是有涌泉出於舍側等江水之香朝朝出

鯉魚二頭供二母膳其泉灌田六頃施及比隣公孫述
平後東精為賊掠害不敢入詩里時大荒餓精致米肉
與詩詩埋之永平三年察孝廉明帝詔曰大孝入朝凡
諸所舉孝廉一切平之除江陽符長所居鄉皆為之立
祠妻龐行同郡龐盛女也孝順尤篤母好飲江水江去
舍六七里妻常汧流而汲後值風不時得還母渴詩責
而遣之妻乃寄止隣舍晝夜紡績市珍羞使隣母以意
自遺其姑如是者久之姑怪問隣母隣母具對姑感慙

呼還

董鈞字文伯資中人習慶氏禮事大鴻臚王臨元始中
舉明經遷廩犧令病去官建武中舉孝廉辟司徒府鈞
博通古今數言政事永平中為博士時草創五郊祭祀
及宗廟威儀禮樂章服輒令鈞叅議多見從用當世稱
為通儒累遷五官中郎將常教授門生百餘人後坐事
左轉騎都尉年七十餘卒

杜撫資中人少師事薛漢治五經教授門徒千人撫沉

靜樂道舉動必以禮後為東平王蒼所辟及蒼就國掾
史皆自劾歸而撫為大夫不忍去蒼聞賜車馬財物遣
之所著詩題約義通學者傳之

段恭字節英雄人少周流七十餘郡求師受學經三十
年馮翊駱異孫泰山彥之章渤海紀叔陽遂明天文二
卷東平虞叔雅學絕高當世遂遊於蜀恭以朋友禮待
之後為上計掾會有司劾太尉龐參兼舉茂才孝廉參
性忠正亮直為貴戚所擯以恚發病遠近稱冤恭抗疏

表叅忠直不當以讒佞傷毀忠正帝悟即日召西曹掾問疾尋羊酒慰勞叅忠

朱倉字雲卿什邡人受學於蜀郡張寧食豆飲水以諷誦同業憐其貧資給米肉不受著河洛解辟郡功曹每察孝廉羞以碌碌詣公府試輒不就以諷詠自終

王渙字稚子新都人父順安定太守渙少好俠尚氣力數通剽輕少年晚而改節敦儒學習尚書通律令畧舉大義為太守陳寵功曹當職割斷不避豪右寵風聲大

行入為大司農和帝問曰在郡何以為理寵頓首謝曰
臣任功曹王渙以簡賢選能主簿鐔顯拾遺補闕臣奉
宣詔書而已帝大悅由此顯名州舉茂才除溫令縣多
姦猾積為人患渙以方畧討擊悉誅之境内清夷商人
露宿於道其有放牛者輒云以屬稚子終無侵犯在溫
三年遷兗州刺史繩正部郡風威肅然後坐考妖言不
實論免歲餘拜侍御史永元十五年從駕南巡還為洛
陽令以平正居身得寬猛之宜其寬嫌久訟歷政所不

斷法理所難平者莫不曲盡情詐壓塞羣疑又能以誦
數發摘姦伏京師稱嘆以為渙有神算元興元年病卒
百姓匝道嘆嗟男女老壯皆相與賦斂致奠醑以千數
渙喪西歸道經弘農民庶皆設槃按於路吏問其故云
常持米到洛為卒司所鈔恒亡其半自王君在事不見
侵枉故來報恩立祠安陽亭西每祀輒絃歌而薦之

鐔顯字子誦鄆人蔡弓字子騫雒人兩人共學冬則侍
親春行受業顯見知於太守陳寵歷豫州刺史光祿大

夫弓為廬江太守徵拜郎

竄叔字茂泰廣漢人與友人張昌共受業太學昌為河南大豪呂條所殺叔為報仇殺條自拘河南獄順帝義而赦之

張鉗字子安廣漢人師事犍為謝裒裒死負土成墳裒子為人所殺鉗復其仇自拘武陽獄會赦免

段翳字元章新都人明經術妙占未來常告大渡津口曰某日當有諸生二人荷擔問翳舍處者幸為告之後

竟如其言又有人從冀州來學積年以精究翳術辭去
翳為筒作書封頭與之告曰有急發之至葭萌爭津吏
過從者頭諸生發筒筒中有書曰到葭萌爭津破頭以
膏裹之生乃喟然知不及翳還更精學翳常隱匿不使
人知門人皆號夫子

翟醕字子超維人四世傳詩醕少事段翳好老子尤善
圖緯天文歷算以報舊讐當徙日南亡於長安為卜相
工後牧羊涼州遇赦還仕郡徵拜議郎遷侍中時尚書

有缺詔將大夫六百石以上試對政事天文道術以高第者補之酺對第一拜尚書時安帝始親政事追感祖母宋貴人悉封其家又元舅耿寶及皇后兄弟閭顯等並用威權酺疏諫其畧曰伏惟陛下應天履阼厯值中興當建太平之功而未聞致化之道益遠者難明請以近事徵之昔竇鄧之寵傾動四方兼官重祿盈金積貨至使議弄神器改更社稷豈不以勢尊威廣致斯患乎及其破壞頭顱墮地願為孤豚豈可得哉夫致貴無漸

失必暴受爵非道殃必疾今外戚寵幸功均造化漢元以來未有等比陛下誠仁恩周洽以親九族然祿去公室政移私門覆車重乘寧無挫折而朝臣在位莫肯正議翕翕訾訾更相佐附臣恐威權外假歸之良難虎翼一奮卒不可制故孔子曰吐珠於澤誰能不含老子稱國之利器不可以示人此最安危之極戒社稷之深計也夫儉德之恭政存約節故文帝愛百金於露臺飾帳帷於皂囊至倉穀腐而不食錢貫朽而不可校今自初

政以來日月未久費用賞賜已不可算斂天下之財積
無功之家帑藏殫盡民力凋傷卒有不虞復當重賦百
姓怨叛既生危亂可待也自去年以來災譴頻數地圻
山移高崖為谷修身恐懼則轉禍為福輕慢天戒則其
害彌深願陛下親自勞卹研精致思勉求忠貞之臣誅
遠佞諂之黨損玉堂之盛尊天爵之重割情欲之權罷
晏私之好帝王圖籍陳列左右心存亡國所以失之鑒
觀興王所以得之庶災害可息豐年可招矣書奏不省

而外戚寵臣咸畏惡之延光三年出為酒泉太守叛羌
千餘騎從燉煌來鈔郡界酺赴擊斬首九百級羌衆幾
盡威名大震遷京兆尹順帝即位拜光祿大夫遷將作
大匠損省經用歲息四五十萬屢因災異多所匡正由
是權貴共誣酺及尚書令高堂芝等交通屬託坐減死
歸家

杜真字孟宗綿竹人少有孝行習易春秋誦百萬言兄
事酺酺被誣劾繫獄真上章救之答六百竟免酺難

乃以漢道衰微因散家財以施宗族公車累辟不應

王忱字少林新都人遊學京師見客舍一書生疾困憊而視之書生謂忱曰我當到洛陽而被病命在須臾腰下有金十斤願以相贈死後乞藏體骨未及問姓名而命絕忱即鬻一斤營其殯葬餘金悉置棺下人無知者歸數年縣署忱大度亭長初到之日有馬馳入亭中止其日大風飄一繡被復墮忱前即言於縣縣以歸忱忱後乘馬到雒縣馬遂奔走牽忱入它舍主人見之喜

曰今禽盜矣問忱所由得馬忱具說其狀并及繡被主人悵然良久乃曰被墮旋風與馬俱亡卿何陰德而致此二物忱自念有葬書生事因說之并道書生形貌及埋金之處主人大驚號曰是我子也姓金名彥前往京師不知所在何意卿乃葬之大恩久不報天以此彰卿德耳忱悉以被馬還之主人不取因告新都令假忱休息自與俱迎子喪餘金俱存忱由是顯名仕郡功曹州治中從事舉茂才除郿令到官至獐亭亭長曰亭有鬼

數殺過客不可宿也。怵曰：德除不祥，何鬼之避？即入亭止宿。夜中聞有女子稱冤之聲，怵囑曰：有何枉狀？可前求理。女子曰：無衣，不敢進。怵便投衣與之。女子乃前訴曰：妾夫為涪令之官，過宿此亭亭，長無狀枉殺妾家十餘口，埋在樓下。悉取財貨，怵問亭長姓名。女子曰：即今門下遊徼者也。怵曰：汝何故數殺過客？對曰：妾不得白，日自訴。每夜陳冤，客輒眠不見，應不勝感。恚故殺之。怵曰：當為汝理。此冤勿復殺人。因解衣於地，忽然不見。明

旦召游徼詰問具服即收繫及同謀十餘人殺之遣吏送其喪歸鄉里

楊厚字仲桓新都人祖春卿父統皆有著作母與前妻子博不相安厚年九歲思令和親乃托疾不言不食母知其旨瞿然改意思養加篤博仕至光祿大夫厚少學統業精力思述初安帝永初二年太白入北斗洛陽大水朝廷以問統統對年老耳目不明子厚曉讀圖書粗識其意鄧太后使中常侍承制問之厚對以為諸王子

多在京師容有非常宜亟發遣各還本國太后從之星
尋滅不見又尅水退期日皆如所言除為中郎太后特
引見問以圖讖不合免歸習業犍為不應州郡三公命
永建二年順帝特徵詔告郡縣督促發遣厚不得已行
到長安以病自上因陳漢三百五十年之厄宜蠲法改
憲之道及消伏災異凡五事制書褒述有詔太醫致藥
大官賜羊酒及至拜議郎三遷為侍中特蒙引見訪以
政事四年厚上言今夏必盛寒當有疾疫蝗蟲之害是

歲果六州大蝗疫氣流行後又連上西北二方有兵氣
宜備邊寇車駕臨當西巡感厚言而止大將軍梁冀威
權傾朝遣弟侍御史不疑以車馬珍玩致遺於厚欲與
相見厚不答固稱病求退帝許之賜車馬錢帛歸家修
黃老教授門生上名錄者三千餘人年八十三卒策書
弔祭鄉人謚曰文父

張壽字伯禧涪人少給縣丞楊放家放為梁賊所得壽
求之積六年始知其生存乃賣家鹽井得三十萬市馬

五疋往贖放道為羌所劫掠盡凡往三年計道遠不可得數乃單身詣虜涕泣自說虜哀其屢來遣放隨還郡召為中候詔書除巫尉以身佩印所有財物與三弟復為郡掾章平賦役歲出三百五十萬徙五官掾卒

李餘涪人父早世兄夷殺人亡命母慎當死餘年十三問人曰兄弟相代能免母否人曰趣得一人耳餘乃詣吏乞代母死吏以其年小不許餘因自死吏以白令令哀傷言郡郡上尚書天子與以財葬圖畫府庭

趙戒字志伯成都人父定以遊俠稱順桓帝時戒厯司徒太尉登時進屢居公輔免憂患於無妄之世告歸於蜀薨於家謚曰文侯子典

趙典字仲經父戒為太尉桓帝立以定策封尉亭侯典少篤善隱約建和初四府表薦徵拜議郎侍講禁內再遷為侍中時帝欲廣開鴻池典諫曰鴻池汎溉已且百頃猶復增而深之非所崇唐虞之約已遵孝文之愛人也帝納其言而止父卒襲封出為弘農太守轉右扶風

又轉大鴻臚與潁川李膺齊名列於八俊時恩澤諸侯以無勞受封羣臣莫敢諫典獨奏曰夫無功而賞勞者不勸上忝下辱亂象干度且高祖之誓非功臣不封宜一切削免爵土以存舊典帝不從頃之轉太僕遷太常朝廷每有災異疑擬輒諮問之典據經正對無所曲折每得賞賜輒分與諸生之貧者後以諫爭違旨免官就國公卿復表典篤學博聞宜備國師會病卒使者弔祠謚曰獻侯典兄子謙謙弟溫相繼為三公

趙謙字彥信初平元年代黃琬為太尉獻帝遷都長安以謙行車騎將軍事為前置復為司隸校尉車師王侍子為董卓所愛數犯法謙收殺之卓大怒殺都官從事而素敬憚謙故不加罪轉為前將軍遣擊白波賊有功封郿侯李傕殺司徒王允復代允為司徒數月病免拜尚書令卒謚曰忠侯

趙溫字子柔順桓之世為巴郡太守於時板楯數反溫到郡以恩信降服之百姓樂業於是巖渠出九穗之禾

昫忍有連理之木遷京兆丞嘆曰大丈夫當雄飛安能
雌伏遂棄官去遭歲大饑散家糧以賑窮餓所活萬餘
人獻帝西遷都以侍中同輿輦至長安封江南亭侯代
楊彪為司空免項之復為司徒錄尚書事時李傕與郭
汜相攻傕遂虜掠禁省劫帝幸北塢外內隔絕傕素疑
溫不與已乃內溫於塢中又欲移乘輿於黃白城溫與
傕書切責曰公前托為董公報讐然寔屠陷王城殺戮
大臣天下不可家見而戶說也今與郭汜爭睚眦之隙

以成千鈞之讐人在塗炭各不聊生朝廷仍下明詔欲
令和解上命不行威澤日損而復欲移轉乘輿更幸非
所此誠老夫所不達也於易一為過再為涉三而弗改
滅其頂凶不如早共和解引軍還屯上安萬乘下全人
民豈不幸甚僉大怒欲遣人殺溫董卓從弟應溫故掾
也諫之數日乃獲免溫從車駕都許建安十三年以辟
司空曹操子丕為掾操怒奏溫辟忠臣子弟選舉不實
免官卒年七十二初文侯與李固胡廣議立清河王蒜

而梁冀欲立蠡吾侯文侯從之使李固枉死君子以為
卓儻之惡甚於梁冀謙摩卓之牙溫弄儻之爪雖逼權
勢以道訓陳賢其祖遠矣

何英字叔俊郿人學通經緯著漢德春秋十五卷孫汶
字景由亦深於學初徵上日食盜賊起有劾為謁者京
師旱請雨即澍遷掾為屬國著世務論三十篇卒

楊由字哀侯成都人為太守廉范文學范稱能治由言
當有賊發頃之廣柔羌反寇殺長姚超鄉人冷豐齎酒

候之偵客未內由為知多少又言人當致果其色赤黃
果有送甘橘者大將軍竇憲從太守索雲氣圖由諫莫
與尋憲受誅其明如此著書十篇而卒

任昉字文始成都人初為葉令治奸賊七十餘人遷梁
相尚書令清身檢下大將軍梁冀憚之出為魏郡徙平
原歲出租稅百萬冀誅復入為尚書令司隸校尉遷大
司農卒弟愷徐州刺史亦有治名昉父循字伯度為長
沙太守得其父時為五官事在精通也

趙旂字子鸞資中人初臨甘陵弘農郡甚善治民徵尚書遷司隸校尉時梁冀子弟放縱旂以法繩之不敢為非京師肅清桴鼓不鳴

柳宗字伯騫成都人初結九友共學號九子及為州郡右職務在進賢拔致求次方張叔遠王仲曾殷智孫等終至牧守州里為諺曰得黃金一筭不如為伯騫所議舉茂才為陽夏太守

楊準字伯邳漢安縣人初為郡守太尉李固薦準累世

忠直拜尚書太傅陳蕃表為河東入為尚書令奏書治
南陽太守曹廉潁川太守曹騰濟南太守孫訓等子弟
依託形勢淫縱徵廷尉治罪訓梁冀婦家子也於是憚
之又薦朱禹盛精滕延為尚書陸稠為郡守皆名士桓
帝即位拜河南尹遷司隸校尉冀叔父梁忠為執金吾
不朝正初劾奏之朝士服其公亮徙將作大匠

常洽字茂居江原人自荊州刺史遷京兆尹侍中長水
校尉以兵衛大駕西幸僮等作難常扶天子為僮所害

楊珏字仲桓成都人羅衡字仲伯郫縣人俱師事徵士何長初珏為茂陵令治化浹洽徙西城閭中令號時名宰衡為萬年令路不拾遺人家牛馬皆繫道邊曰屬羅公三府爭辟拜廣漢長二縣皆為立祠

陳湛字小伯成都人歷數縣令民皆懷之州辟治中從事廣漢太守遣子詣州修歡交使君欲納湛諫不可失羔羊義使君從之後有言州郡私交者考之無得乃明也

任安字定祖綿竹人少遊太學受孟氏易兼通數經又從同郡楊厚學圖讖究極其術時人稱曰欲知仲桓問任安又曰居今行古任定祖學終還家教授察孝廉及茂才太尉再辟除博士公車徵皆稱疾不就州牧劉焉表薦之時王塗隔塞詔命竟不至年七十九卒於家弟子杜微何宗杜瓊皆知名仕至卿佐

董扶字茂安綿竹人少遊太學與鄉人任安同事楊厚學圖讖還家講授弟子自遠而至前後宰府十辟公車

三徵再舉賢良方正博士有道皆稱疾不就靈帝時大將軍何進薦扶徵拜侍中甚見器重扶私謂太常劉焉曰京師將亂益州分野有天子氣焉信之遂求為益州牧扶亦求為蜀郡屬國都尉相與入蜀去後一歲已已天下大亂乃棄官還家年八十二卒後劉氏稱帝於蜀皆如扶言諸葛亮問廣漢秦宓以董任所長宓曰董扶褒秋毫之善貶纖芥之惡任安記人之善忘人之過

折象字伯式雒人其先張江為武威太守封南陽折侯

因氏馬父國為鬱林太守徙廣漢有貲財二億奴姬八百人象幼有仁心不殺昆蟲不折萌芽能通京氏易好黃老言事東平虞叔雅以道教授門人時人為諺曰折氏客誰朱雲卿段節英中有佃子趙仲平但說天文論五經及國卒感多藏厚亡之義盡散金帛資產周旋親疎或諫象曰君三男兩女孫息盈前當增益產業何為坐自單竭乎象曰昔鬬子文有言我乃逃禍非避富也吾門戶殖財日久盈滿之咎道家所忌今世將衰子又

不才不仁而富謂之不幸牆隙而高其壞必疾也智者聞之咸服焉自知亡日召賓客九族飲食辭訣忽然而終

諒輔字漢儒新都人仕郡為五官掾時夏大旱太守自出祈禱山川連旬不雨輔乃自庭中慷慨祝曰輔為股肱不能進諫納忠薦賢退惡和調陰陽承順天意致令天地否隔萬物焦枯百姓喁喁無所訴告咎盡在輔今郡太守改服責已為民祈福精誠懇到未有感徹輔今

敢自祈請若至日中不雨乞以身塞無狀於是積薪柴聚茭茆以自環構火其旁將自焚焉未及日中天雲晦合須臾澍雨一郡霑足世以此稱其至誠

朱普字伯禽廣都人為郡功曹刺史壬冀與太守有隙訐劾之逮普詣新都獄掠笞連月肌肉臭腐以證太守無罪垂死勅其子曰我死載喪詣闕使天子知我心事得請普以烈聞

韓揆字伯彥綿竹人為縣主簿會黃巾賊至揆扶縣令

錡哀避入草中哀遣揆求隱翳處未還哀為賊所得見害揆殞殮葬訖乃詣從事賈龍求兵討賊賊破揆嘆曰本以報令君而苟自活非忠臣也遂自殺

左喬雲綿竹人少為左通養子通坐任徒逃吏欲破通贖喬雲時年十三喟然憤怒以銳刀殺吏解通將走令初聞以為壯士及知小兒為之流涕

景毅字文堅漢州人靈帝時為侍御史李膺以黨錮見捕毅子顧為膺門徒未有錄牒不逮於譴毅慨然曰本

謂膺賢遣子師之豈可以漏名脫籍苟安而已遂自表
免歸

王商字文表廣漢人博學多聞州牧劉璋辟為治中試
守蜀郡太守荊州牧劉表大儒南陽宋仲子遠慕其名
皆與交好許文休稱商中夏王景興輩也商勸璋攬奇
拔俊甚善匡捄薦致名士安漢趙韙及陳實盛先塾江
龔楊趙敏黎景閔中王澹江州孟彪皆至右職又為嚴
李立祠正諸祀典在官一十年卒

何宗字彥英郫人師事廣漢任安學問精博先主定益州辟為從事祭酒多所獻替族人何祗字君肅與之齊名初健為揚洪為太守李嚴功曹去郡數年以為蜀郡嚴在官祗為洪門下書佐去郡數年以為廣漢洪猶在官是以西土咸服諸葛亮之能攬拔秀異也祗徙健為太守卒

王累新都人州牧劉璋遣法正迎先主主簿黃權諫不納累為從事乃自刎於州門以明其不可

鄭度綿竹人先主自葭萌南攻度說州牧劉璋曰左將軍懸軍襲我野穀是資今急驅巴西梓潼之民自涪水以南一切燒除野穀固壘待之彼請戰不許久無所資不過百日必當回矣璋不納

李仁字德賢涪人益部多貴今文而不崇章句仁知其不博乃遊學荊州從司馬德操宋仲子受古學以修文自終

三國

彭義宇永年廣漢人姿性驕傲多所輕忽惟敬同郡秦
宓子勅薦之於太守許靖義仕州不過書佐後又為衆
人所謗毀州牧劉璋髡鉗義為徒隸會先主入蜀汴流
北行義欲納說先主乃往見龐統統與義非故人又適
有賓客義徑上統床卧謂統曰須客罷當與卿善談統
客既罷往就義坐義又先責統食然後共語因留信宿
至於經月統大善之而法正宿自知義遂並致之先主
先主亦已為奇數令義宣傳軍事指授諸將奉使稱意

識遇日加成都既定先主領益州牧拔義為治中從事
義起徒步一朝處州人之上形色囂然自矜得遇滋甚
諸葛亮雖外接侍義而內不能善屢密言先主義心大
志廣難可保安先主既敬信亮加察義行事意以稍疎
左遷義為江陽太守義聞當遠出私情不悅往詣馬超
超問義曰卿才具秀拔主公相待至重謂卿當與孔明
孝直諸人齊足並驅寧當外授小郡失人本望乎義曰
老革荒悖不復道耶又謂超曰卿為其外我為其內天

下不足定也超羈旅歸國常懷危懼聞義言大驚默然
不應義退具表義詞於是收義付有司義於獄中與諸
葛亮書曰僕昔有事於諸侯以為曹操暴虐孫權無道
振威闇弱其惟主公有霸王之器可與興業致治故乃
翻然有輕舉之志會公來西僕因法孝直自銜嚮龐統
斟酌其間遂得詣公於葭萌指掌而談論治世之務講
霸王之義建取益州之策公亦宿慮明定即相然贊遂
舉事焉僕於故州不免凡庸憂於罪罔得遭風雲激矢

之中求君得君志行名顯從布衣之中擢為國士盜竊
茂才分子之厚誰復過此曾一朝狂悖自求殄醢為不
忠不義之鬼乎先民有言左手據天下之圖右手刎咽
喉愚夫不為也況僕頗別菽麥者哉所以有怨望意者
不自度量苟以為首興事業而有投江陽之論不解主
公之意意卒感激頗以被酒悅失老語此僕之下愚薄
慮所致主公實未老也且夫立業豈在老少西伯九十
寧有衰志負我慈父罪有百死至於內外之言欲使孟

起立功北州戮力主公共討曹操耳寧敢有他志耶孟
起說之是也但不分別其間痛人心耳昔每與龐統共
相誓約庶託足下末蹤盡心於主公之業追名古人載
勲竹帛統不幸而死僕敗以取禍自我蹈之將復誰怨
足下當世伊呂也宜善與主公計事濟其大猷天明地
察神祇有靈復何言哉貴使足下明僕本心耳行矣努
力自愛自愛兼竟誅死時年三十七

秦宓字子勅綿竹人少有才學州郡辟命輒稱疾不往

劉璋時宓同郡王商為治中從事與宓書曰貧賤困苦
亦何時可以終身卞和銜玉以耀世宜一來與州尊相
見宓荅書曰昔堯優許由非不弘也洗其兩耳楚聘莊
周非不廣也執竿不顧易曰確乎其不可拔夫何銜之
有且以國君之賢子為良輔不以是時建蕭張之策未
足為智也僕幸暴背於隴畝之中誦顏氏之簞瓢詠原
憲之蓬戶時翱翔於林澤與沮溺之等儔聽玄猿之悲
吟察鶴鳴於九臯安身為樂無憂為福處空虛之名居

不靈之龜知我者希則我貴矣斯乃僕得意之秋也何
困苦之戚焉後商為嚴君平李弘立祠宓與書曰疾病
伏匿甫知足下為嚴李立祠可謂厚黨勤類者也觀嚴
文章冠冒天下由夷逸操山嶽不移使揚子不嘆固自
昭明如李仲元不遭法言令名必淪其無虎豹之文故
也可謂攀龍附鳳者矣如楊子雲潛心著述有補於世
泥蟠不滓行參聖師於今海內談咏厥辭邦有斯人以
耀四遠怪子替茲不立祠堂蜀本無學士文翁遣相如

東受七經還教吏民於是蜀學比於齊魯故地里志曰
文翁倡其教相如為之師漢家得士盛於其世仲舒之
徒不達封禪相如制其禮夫能制禮造樂移風易俗非
禮所秩有益於世者乎雖有王孫之累猶孔子大齊桓
之霸公羊賢叔術之讓僕亦善長卿之化宜立祠堂速
定其銘先是李權從宓借戰國策宓曰戰國縱橫用之
何為權曰仲尼嚴平會聚衆書以成春秋指歸之文故
海以合流為大君子以博識為弘宓報曰書非史記周

圖仲尼不采道非虛無自然嚴平不演海以受淤歲一
蕩清君子博識非禮不視今戰國反覆儀秦之術殺人
自生亡人自存經之所疾故孔子發憤作春秋大乎居
正復制孝經廣陳德行杜漸防萌預有所抑是老氏絕
禍未萌豈不信邪成湯大聖覩野魚而有獵逐之失定
公賢者見女樂而棄朝事若此輩類焉可勝陳道家法
曰不見可欲使心不亂是故天地貞觀日月貞明其直
如矢君子所履洪範記災發於言貌何戰國之譎權乎

哉或謂宓曰足下欲自比於巢許四皓何故揚文藻見
瓌穎乎宓荅曰僕文不能盡言言不能盡意何文藻之
有揚昔孔子三見哀公言成七卷事益有不可嘿嘿也
接輿行且歌論家以光篇漁父咏滄浪賢者以耀章此
二人者非有欲於時者也夫虎生而文炳鳳生而五色
豈以五采自飾畫哉天性自然也蓋河洛由文興六經
由文起君子懿文德采藻其何傷以僕之愚猶恥革子
成之誤況賢於已者乎先主既定益州廣漢太守夏侯

纂請宓為師友祭酒領五官掾稱曰仲父宓稱疾卧在
茅舍纂將功曹古朴主簿王普厨膳即宓第晏談宓卧
如故纂問朴曰至於貴州養生之具實絕餘州矣不知
士人何如餘州也朴對曰乃自先漢以來其爵位者或
不如餘州耳至於著作為世師式不負於餘州也嚴君
平見黃老作指歸揚雄見易作太玄見論語作法言司
馬相如為武帝制封禪之文於今天下所共聞也纂曰
仲父何如宓以簿擊頰曰願明府勿以仲父之言假於

卷四十一
小草民請為明府陳其本紀蜀有汶阜之山江出其腹
帝以會昌神以建福故能沃野千里淮濟四瀆江為其
首此其一也禹生石紐今之汶山郡是也昔堯遭洪水
鯀所不治禹疏江決河東注於海為民除害生民以來
功莫先者此其二也天地布治房心決政參伐參伐則
益州分野三皇乘祗車出谷口今之斜谷是也此便鄙
州之阡陌明府以雅意論之何若天下乎於是纂逡巡
無以復荅益州辟宓為從事祭酒先主既稱尊號將東

征吳宓陳天時必無其利坐下獄幽閉然後貸出建興二年丞相亮領益州牧選宓迎為別駕尋拜左中郎將長水校尉吳遣使張溫來聘百官往餞衆人皆集而宓未往亮累遣使促之溫曰彼何人也亮曰益州學士也既至溫問曰君學乎宓曰五尺童子皆學何必小人溫復問曰天有頭乎宓曰有之溫曰在何方也宓曰在西方詩曰乃眷西顧以此推之頭在西方溫曰天有耳乎宓曰天處高而聽卑詩云鶴鳴九臯聲聞於天若其無

耳何以聽之溫曰天有足乎宓曰有詩云天步艱難之
子不猶若其無足何以步之溫曰天有姓乎宓曰有溫
曰何姓宓曰姓劉溫曰何以知之荅曰天子姓劉故以
此知之溫曰日生於東乎宓曰雖生於東而沒於西荅
問如響應聲而出於是溫大敬服宓之文辯皆此類也
遷大司農四年卒初宓見帝系之文五帝皆同一族宓
辯其不然之本又論皇帝王霸養龍之說甚有通理譙
允南少時數往諮訪記錄其言於春秋然否論文多故

不載

杜瓊字伯瑜成都人少受學於任安先主定益州以瓊為議曹從事後主踐祚拜諫議大夫遷大鴻臚太常為人靜默少言闔門自守不與世事蔣琬費禕等皆器重之瓊精于術學初不視天文有所論說後進譙周常問其意瓊曰欲明此術甚難須當身視識其形色不可信人也晨夜苦劇然後知之復憂漏泄不如不知是以不復視也周因問曰昔周徵君以為當塗高者魏也其義

何居瓊荅曰魏闕名也當塗而高聖人取類而言耳又問周曰寧復有所怪耶周曰未達也瓊又曰古者名官職不言曹始自漢以來名官盡言曹吏言屬曹卒言侍曹此殆天意也瓊年八十餘卒著韓詩章句十餘萬言

張裔字君嗣成都人治公羊春秋博涉史漢汝南許文休入蜀謂裔幹理敏捷中夏鍾元常之倫也劉璋時舉孝廉為魚復長還州署從事領帳下司馬張飛自荊州由墊江入璋授裔兵拒於德陽陌下軍敗還成都為璋

奉使詣先主先主許以禮其君而安其人也蜀平先主以裔為巴郡太守還為司金中郎將典作農戰之器先是益州郡殺太守正昂耆率雍閬恩信著於南土使命周旋遠通孫權乃以裔為益州太守徑往至郡閬遂超起不賓假鬼教曰張府君如瓠壺外雖澤而內實麤不足殺令縛與吳於是遂送裔於權會先主薨諸葛亮遣鄧芝使吳亮令芝言次可從權請裔裔自至吳數年流徙伏匿未之知也故許芝遣裔裔臨發權乃引見問曰

蜀卓氏寡女亡奔司馬相如貴土風俗何乃爾乎裔對
曰愚以為卓氏之女猶賢於買臣之妻權又謂裔曰君
還必用事西朝終不作田父於閭里也將何以報我對
曰裔負罪而歸將委命有司若蒙微倖得全首領五十
以前父母之年也自此以後大王之賜也權言笑懽悅
有器裔之色裔出閤即便就船倍道兼行權果追之裔
已入永安界數十里追者不能及既至丞相亮以為叅
軍署府事又領益州治中從事亮出駐漢中裔以射聲

校尉領留府長史常稱曰公賞不遺遠罰不阿近爵不
可以無功取刑不可以貴勢免此賢愚之所以僉忘其
身者也明年北詣亮諮事送者數百車乘盈路裔還書
與所親曰近者涉道晝夜接賓不得寧息人自敬丞相
長史男子張君嗣附之疲倦欲死其談啁流連皆此類
也少與犍為楊恭友善恭早死遺孤未數歲裔迎留與
分屋而居事恭母如母恭之子長大為之娶婦買田宅
產業使立門戶撫恤故舊振贍衰宗行義甚至加輔漢

將軍長史如故建興八年卒

李福字孫德涪人先主初為成都令建興九年遷巴西太守後為江州都督揚武將軍入為尚書僕射封平陽亭侯延熙初以前監軍司馬福同郡梓潼文恭仲寶亦以才幹為牧亮治中從事丞相叅軍常璩讚曰孫德果銳作劉幹臣

李謨字欽仲涪人少傳父仁業又從尹默學自五經四部百家諸子無不該覽加博好伎藝算術卜數醫藥弓

弩機械之巧皆致思焉始為州書佐尚書令史延熙元
年後主立為太子以誤為庶子遷為僕射轉中散大夫
右中郎將猶侍太子太子愛其多知甚悅之然體輕脫
好戲啁故世不能重也著古文易尚書毛詩三禮左氏
傳太玄指歸皆依準賈馬異於鄭玄與王氏殊隔初不
見其述而意歸多同景耀中卒

尹默字思潛涪人少與李仁俱受學司馬徽宋忠等博
通五經精專左氏自劉歆條例鄭衆賈逵父子陳元方

服虔注說咸畧誦述不復按本先主定益州以為勸學從事及立太子以默為僕射以左氏傳授後主後主踐阼拜諫議大夫丞相亮駐漢中請為祭酒亮卒還成都拜太中大夫卒子宗傳其業為博士

杜微字國輔涪人少受學於廣漢任安劉璋辟為從事以疾去官及先主定蜀微常稱聾閉門不出建興二年丞相亮領益州牧選迎皆妙簡舊德以微為主簿微固辭輦而致之既至微自陳謝亮以微不聞人語於坐上

與書曰服聞德行饑渴歷時清濁異流無緣咨覲王元
泰李伯仁王文儀楊季休丁君幹李永南兄弟文仲寶
等每歎高志未見如舊猥以空虛統領貴州德薄任重
惻惻憂慮朝廷主公今年始十八天姿仁敏愛德下士
天下之人思慕漢室欲與君因天順民輔此明主以隆
季興之功著名於竹帛也以謂賢愚不相為謀故自割
絕守勞而已不圖自屈也微自乞老病求歸亮又與書
曰曹丕篡弒自立為帝是猶土龍芻狗之有名也欲與

羣賢因其邪偽以正道滅之怪君未有相誨便欲求還
於山野丕又大興勞役以向吳楚今因多務且以閉境
勤農育養民物並治甲兵以待其挫然後伐之可使兵
不戰民不勞而天下定也君但當以德輔時耳不責君
軍事何為汲汲欲求去乎其敬微如此拜為諫議大夫
以從其志

常播字文平江原人建興中為縣功曹縣長被誣逋沒
官穀當論重罪播詣獄爭辯受數千杖肌骨潰爛更歷

三獄幽閉二年終無異詞事遂解縣長得釋

王嗣字承宗資中人舉孝廉為汶山太守加安遠將軍綏集羌胡雖素桀惡者皆來降大將軍姜維每出北征輒出馬牛羊及軍糧乃遷嗣鎮軍仍領郡後從維北征為流矢所傷卒戎狄皆會葬號呼涕泣隨之凡見嗣子孫皆若見其骨肉云

晉

任熙字伯遠成都人治毛詩京易博通五經事親至孝

卷之十一
察孝廉除南鄭令復授梓潼令辭疾告歸勸農力穡居
室致給循訓闔門內則可法開門待賓傾懷下士客無
長幼必有供贍太康中除越雋護軍不往徵給事中終
以疾辭而蜀守令每至官為之修謁歲致羊酒即家拜
朱提太守固讓不之官熙好述作詩誄論難文皆燦艷
年六十九卒子蕃涪陵太守蕃子廸字叔孤少與巴西
龔壯齊名而學業過之

壽良字文淑成都人少與犍為張徵費緝齊名良治春

秋三傳貫通五經澡身貞素厯官始平太守治政著稱
從扶風轉秦國內史溫令李宓表薦武帝以良為公朝
英特二州之望云

柳隱字休然成都人少與同郡杜禎柳伸齊名隱直誠
篤亮交友居厚達於從政數從大將軍姜維征伐為牙
門將巴郡太守騎都尉遷漢中黃金圍督及鍾會伐蜀
入漢川圍伐多下惟隱堅壁不動後主既降以手令勅
隱乃詣會晉文帝聞而義之咸熙元年内移河東拜議

郎武帝即位以為西河太守在官三年乞還蜀卒於家
杜禎在蜀為涼益二州都督柳仲在蜀為度支入晉並
舉秀才

何隨字季業漢司空武之後世有名德徵聘入官隨治
韓詩歐陽尚書研精文緯通星厯郡命功曹州辟從事
光祿郎中主事除安漢令蜀亡去官時土饑荒所在無
穀送吏行乏取道旁民芋隨以綿繫其處使足芋直民
視芋見綿知必何安漢乃持綿追還之終不受及晉踐

昨臺召不詣除河間王郎中不就居貧固儉弊衣蔬食
晝耕夕讀鄉族饋遺一切不納目不視色口不語利著
譚言十篇論道德仁義常有屠牽猪過隨門者猪索斷
失之強認隨園中猪隨便牽猪與之屠人出門尋得其
所亡猪謝隨還猪遂以丐之家有竹園人盜其笋隨行
見之恐盜者覺怖走竹中傷其手足挈屐徐步而歸太
康中即家拜江陽太守民思其政卒於官長子觀字巨
忠清公淑慎知名州里察孝廉除平西長史會張昌亂

荊州從黨西上郡守無不降下至江陽平西將軍羅尚表觀安遠護軍討賊平之遷巴郡太守會病卒

何攀字惠興漢何武弟潁川太守顯後也仕州為主簿屬刺史皇甫晏為牙門張弘所害誣以大逆時攀寔丁母憂遂詣揚州拜表證晏不反故晏寃理得伸王濬為益州辟攀別駕濬謀伐吳遣攀奉表詣臺口陳事機詔再引見乃令張華與攀籌量進討之宜兼遣攀過羊祜面陳伐吳之策攀善于將命帝善之詔攀參濬軍事及

孫皓降濬而王渾恚于後機欲攻濬攀勸濬送皓與渾
由是事解濬入拜輔國為司馬封關內侯攀轉滎陽令上
便宜十事甚得名稱除廷尉平時廷尉卿以攀蜀士輕
之及共斷疑獄卿始歎服轉散騎侍郎楊駿執政多樹
親屬大開封賞欲以恩澤自衛攀以為非乃與共立議
奏之帝不納後以預誅駿功封西城侯邑萬戶賜絹萬
疋弟逢平鄉侯兄子達關內侯固讓所封戶及絹之半
餘所受者分給中外宗親畧不入已後為揚州刺史遷

大司農轉兗州刺史鷹揚將軍固讓不就太常成燎左將軍卞粹勸攀蒞職中詔又加切厲攀竟稱疾不起及趙王倫篡位遣使召攀更稱疾篤倫怒將誅之不得已扶赴召卒于洛陽時年五十八攀居心平允蒞官整肅愛樂人物敦儒貴材為梁益二州中正引致遺滯巴西陳壽閻義犍為費立皆西州名士並被鄉所謗于清議十餘年攀申明屈直咸免寃濫雖居顯職家甚貧素無妻媵伎樂惟以固窮濟乏為事子璋嗣有父風

王長文字德獻廣漢郫人父顓字伯元隸為太守長文
天姿聰警高暢敏識治五經博通羣籍弱冠州三辟書
佐丁時興衰託疾歸家大同後郡功曹察孝廉不就遂
陽愚嘗着絳衣絳帽牽猪過市中乞人與語偽不聞常
騎牛周旋郡守至詣門修敬至閭走出請終不還刺史
淮南胡罷辟從事祭酒卧在治罷出板舉秀才長文陽
發狂疾步擔走出門罷累遣教請還終不顧還家養母
獨講學著無名子十二篇依則論語又著通經四篇亦

有卦名擬易玄以為春秋三傳傳經不同每生訟議乃據經摭傳著春秋三傳十二篇又撰約禮記除煩舉要凡十篇皆行於時長文才鑒清妙汎愛廣納放蕩濶達不以細宜廉分為意亦不好臧否人物故時人愛而敬之以母欲祿養咸寧中領蜀郡太守郕有孝子羅偶事親至孝二親將亡時病不能食肉終身不食肉郡察孝廉長文追為立表以旌之宰府辟三司及撫軍大將軍王濬累辟不詣濬薨以故州將軍弔祭元康初試守江

原令縣收盜賊長文引見誘慰時適臘晦皆遣歸家獄
先有繫囚亦遣之謂曰教化不厚使汝等如此長吏之
過也蜡節慶析歸就汝上下善相懽樂過節來還當為
思他理羣吏惶遽爭請不許尋有赦令無不感恩所宥
人輒不為惡曰不敢負王君將喪去官民思其政大將
軍梁王彤及諸府並辟長文曰吾從其先命者遂應彤
招為從事中書郎諸王公卿慕其名咸與之交賈氏之
誅從彤有功封關內侯再為中書郎愍懷太子死於許

下博士中書論虞祔之禮長文議虞祭宜還東宮以繼
太子者為主配食於潁川府君皆施行除洛陽令長文
見彤曰主者不庶幾奏長文為洛陽令彤笑荅曰卿乃
不庶幾非主者也固辭不拜聞益州亂以通經筮得老
蠶緣枯桑之卦歎曰桑無葉蠶以卒也吾蜀人殄於是
矣拜蜀郡太守暴卒時年六十四

李穀字允剛廣漢人祖父朝字偉南州別駕從事父旦
字欽宗光祿郎中主事穀少散達不治素檢年二十餘

乃詣郡文學受業通詩禮訓詁為學主事太守弘農王
濬臨學講試問祭酒姬艷曰學中有可成進幾百人艷
對曰可有百人濬怒曰童冠八百而成者百人教少何
為毅對曰如艷之言明府之教盛於孔氏不為少也濬
竒之命為主簿濬嘗夢得三口刀云人以禾益之手持
不得以問郡丞與縣吏莫能知毅對曰吉祥也三刀者
州字而益之禾持不得禾旁失者秩字明府秩當至益
州濬笑曰如卿言當相以為秀才張弘殺益州刺史皇

甫晏誣奏晏反毅白濬曰皇甫侯起自諸生位極方州
反當何求且廣漢與成都密邇而統梁州者衿益州之
領須防若今日也益州有禍乃此郡之憂加張弘小賢
衆所不與宜時赴討濬欲先上後行毅曰大夫出疆苟
利社稷專之為賢何況殺主賊急當不拘常宜濬從之
發兵與牙門蒲泰等共討弘斬之詔書遷濬益州刺史
毅復為州主簿別駕舉秀才及濬伐吳與何攀並為叅
軍吳平封關内侯除隴西護軍以疾去官徙繁令遷雲

南太守濬臨薨上表後武帝思濬勲問毅所在徙健為使持節南夷校尉久之健為民毛詵李叡與朱提民李孟共逐太守杜俊雍約以叛衆數萬毅討破之斬詵孟首叡走依五茶夷亦叛晉朝復置寧州以毅為刺史加龍驤將軍封成都縣侯夷遂大反破沒郡縣攻圍州城中原亂而李雄寇蜀救援不至疾病薨於窮城懷帝嘉其忠節追贈少府謚曰威侯毅性通博居情雅厚賑卹寒貧篤於故舊人咸愛歸之但好談啁德重猶少從弟

苾字叔平少修身砥厲名行數諫毅宜自矜嚴毅笑應之曰吾小來不治名素終杖旄節故可至九卿卿清儉履道卒不失成都令也時毅始受南夷而苾歷城令果作成都遷犍為太守位官不及毅毅子釗以父任為謁者除壽林侯相不就為尚書外兵郎自表赴難至犍犸夷斷道不得進經年以寧州城中無毅父疾病未知吉凶不食穀惟茹草迨及奔喪官至朱提越雋太守西夷校尉毅女秀適漢嘉太守新都王載有才智父亡後州

文武推領州事二載晏然

高玩字伯珍成都人少受學於太常杜瓊術藝微妙博聞強識清尚簡素少與李泌齊名官位相比大同後察孝廉除曲陽令單車之縣移檄縣綱紀不使遣迎以明三才徵為太史令送者亦不出界朝廷稱之方論大用會卒

杜軫字超宗成都人父雄為維令軫少事譙周博涉經書州辟不就為郡功曹史鄧艾至成都軫白太守曰今

大將軍來征必除舊布新明府宜避之此全福之道也
太守乃出艾果遣其叅軍牽弘自之郡問前守何在軫
正色對曰前守達去就之機輒自出官舍以俟君子弘
器之命復為功曹軫固辭察孝廉除建寧令道以德政
風化大行夷夏悅服秩滿將歸羣蠻追送賂遺甚多軫
一無所受去如初至入除池陽令為雍州十一郡最百
姓生為立祠得罪者無怨言屢徙尚書郎博聞廣涉奏
議論駁多見施用時涪人李驤亦為尚書郎與軫齊名

每有論議朝廷莫能踰之號蜀有二郎軫後拜犍為太守甚有聲譽當遷會病卒年五十一子毗字長基州舉秀才遷尚書郎叅太傅軍事及洛陽覆沒毗渡江王敦表為益州刺史與宜都太守柳純共圖白帝杜弢遣軍要之遂遇害毗弟秀字彥頴為羅尚主簿為氐賊李驤所得欲用為司馬不從見害毗次子歆舉秀才軫弟烈舉孝廉歷牛鞞安陽令所居有異績遷衡陽太守軫亡因自表兄子幼弱求去官詔轉犍為太守烈弟良舉秀

才除新都令遷涪陵太守本州大中正

常騫字季慎江原人治毛詩三禮清尚知名封關內侯以晉政衰固辭去官性泛愛敬友宗族當官修理恕以撫物州鄉以為儀範

常寬字泰恭騫之族弟治毛詩三禮春秋尚書尤耽大易博涉史傳而謙虛清素郡命功曹及察孝廉皆不就州辟主簿刺史羅尚舉秀才為侍御史除繁令以蜀將喪去官湘川亂乃南入交州鳩合經籍研精著述元帝

踐祚嘉其德行潔白拜武平太守民悅其政在官三年去職卒於交州子長生字彭祖亦有學行州主簿資中令治中從事早亡

常勗字修業江原人祖父員牂牁永昌太守父高廟令從父閔漢中廣漢太守勗少與閔子忌齊名安貧樂道志篤墳典治毛詩尚書涉治羣籍多所通覽州命辟從事入為光祿郎中主事入為尚書左遷郎郡請迎為功曹時州將董軍政置從事職興刑獄以勗清亮復為

督軍治訟平當還察孝廉除郡令政簡不煩魏征西將軍鄧艾伐蜀破諸葛瞻於綿竹威振西土諸縣長吏或望風降下或委官奔走勗獨率吏民固城拒守後主檄令乃詣艾故郫穀帛全完刺史袁邵嘉其志節辟為主簿勗善儀容翔集動為表觀言論壯烈州里重之然交友惟賢不交下已者汎愛之恩猶不足云

常忌字茂通蜀謁者黃門侍郎喪親以致孝聞察孝廉為即使吳稱職厯長水參軍什邡雒令大同後刺史邵

坐治城被徵忌詣洛陳訴遠國初附君民始結不宜解
易又表修治城池居安思危邊將常職事皆中情晉文
帝時為相國辟忌舍人武帝踐阼拜騎都尉除河內令
州名為難治忌挫折豪勢風教大行縣有姦梗殺兄者
羣黨蔽匿前令莫得忌皆窮治入為州都方議為郡守
會卒忌為人信道任數不從下人故為貴勢所不善是
以作詩著論先攻已短臨喪與樂歡哀俱至為士類所
稱忌友人廣漢段宗仲亦有學行蜀時官與忌比袁邵

為主簿與忌共理郡事文帝善之梁州辟別駕從事舉秀才相遷官至雲南建寧太守

司馬勝之字興先綿竹人學通毛詩三禮清尚虛素不事榮利為郡功曹歷新繁令徵為散騎侍郎以宗室禮之終以疾辭即家拜漢嘉太守固讓不之官間居清靜謙卑自牧訓化鄉閭以恭敬為先

王化字伯遠王商子也治毛詩三禮春秋公羊傳察孝廉為樂涑令縣近邊塞值寇反化率吏民積穀堅守重

圍孤絕七年伺寇怠惰出軍擊之民得野掠大軍至寇退以功封關內侯遷朱提太守轉梓潼皆有稱績為人謹重言論方雅臧否允衷州里服其誠亮弟振字仲遠亦有德望為巴東太守少弟崇

崇字幼遠學業淵博雅性洪粹蜀時為東觀郎入晉官至上庸蜀郡太守著蜀書與陳壽頗不同

元常江原人廣都令常長女適廣漢便敬賓早亡元常無子養賓族子父母欲嫁之廼祝刀誓志而死

靡常仲山女適成都殷仲孫家遭疫氣死亡惟靡常在
年十八收葬諸喪養遺生子立美成家

公乘會妻廣都張氏女也夫早亡無子姑及兄弟欲改
嫁之張誓不許而言之不止乃斷髮割耳養會族子事
姑終身

廣柔長郢姚超二女姚妣饒未許嫁隨父在官值九種
夷反殺超獲二女欲使牧羊二女誓不辱乃以衣連腰
自沉水中死見夢告兄慰曰姊妹之喪當以某日至泚

下慰寤哀愕果如夢日得喪郡縣圖象府庭

紀常常侍常洽女趙侯夫人也父遇害在長安二兄皆
先歿遣父門生瞿登張順迎喪時寇賊蜂起晝夜悲哀
順登得將喪無恙還時人皆以紀常精誠所感

正流廣漢李元女楊文妻也適文有一男一女而文歿
以織履為業父欲改嫁之乃自沉水中扶救始免太守
五方為之圖象

敬楊涪人郭孟妻楊文之女也始生失母八歲父被

閹

盛所殺敬楊無宗親依外祖鄭氏年十七適孟孟與盛有舊盛數往來孟家敬楊泣謂孟曰惡讐未報未嘗一日忘恐卒狂惑益君禍患君宜疎之孟以告盛盛不納漢安元年盛至孟家敬楊以大杖打殺盛將自殺孟止之與俱逃涪令出追聞其故而止安慰二門會赦得免

義舊狄道長姜穆女綿竹司馬雅妻也既許婚父坐事徙朔方雅就婚死僱人送其喪尋父母死朔方義舊獨與弟孤居十年士大夫求終不肯乃上疏自訟求還鄉

里天子愍悼下朔方使送遂下詔書定律令女已許嫁
不得從父母徙

紀配廣漢殷氏女廖伯妻也年十六適伯伯早亡配有
美色慮人求已作詩三章自誓而求者猶衆父母將許
乃斷指明情養子猛終義太守薛鴻圖象府庭

彭非廣漢王輔妻也王和新都人便敬妻也李進娥鄭
人馬季牢妻也輔早亡叔父欲改嫁非乃詣太守五方
截髮自誓敬亦早亡和養孤守義蜀郡何王因媒介求

之兄曉喻以公族可憑和惠割其一耳季宰亦早亡父
母欲改嫁進娥亦剪髮自誓各養子以終其義

相烏德陽人袁稚妻也十五適稚二十稚亡無子父母
欲改嫁之便自殺袁福亦德陽人王上妻也有二子上
以喪親過哀死福哀感終身父母欲改嫁之遂自殺

汝敦妻某敦兄弟共居有父母時財嫂心欲得妻勸送
二兄敦盡讓田宅奴婢與兄自出居後敦耕得金一器
妻復勸送二兄夫妻共往嫂性吝嗇謂欲借貸甚不悅

及見金踊躍兄感悟即出妻讓財還弟弟不受相讓積年後並察孝廉世為冠族

涪杜李女者巴郡虞顯妻也年十八適顯顯亡無子李欲改嫁與同縣楊上慈曰受命虞氏虞氏早亡妾之不幸當生事賢姑死就養成室存亡等但欲在終養亡不有恨願不易圖李知不可告而奪也乃密謀與強逼迫之慈縊而死

叔紀霸女孫也適廣漢王尊至有賢訓事姑以禮生子

商海內名士廣漢周幹古朴彭懿漢中祝龜為作頌曰
少則為家之孝女長則為家之賢婦老則為子之慈親
終溫且惠秉心塞淵宜謚曰化明惠母

昭儀新繁張氏女廣漢朱叔賢妻也賢為郡督郵建安
十九年劉先主圍劉璋於成都賢坐謀外降璋以昭儀
配兵將見逼昭儀自殺三軍莫不哀嘆

趙媛姜資中盛道妻建安五年道坐罪夫婦閉獄子翔
方五歲姜謂道曰官有常刑君不得免矣妾在何益君

門戶君可同翔亡命妾代君死可得繼君宗廟道依違
數日姜苦勸之遂解脫給衣糧使去姜代為應對度道
走遠乃告吏自殺後遇赦父子得還道雖仕宦終不更
娶

貢羅郢羅倩女景奇妻也奇早亡無子父愍其年壯以
許同郡何詩貢羅白書誓父不還家父使詩白州州告
縣逼遣之羅乃訴州刺史高而許之

玆何郢何氏女成都趙憲妻也憲早亡無子父母欲改

嫁之何恚憤自幽不食旬日而死郡縣為立石

貞玦字瓊玉牛鞞程氏女張惟妻也年十九適惟未期
惟亡無子養兄悅子供養舅姑夙夜不怠資中王冲欲
娶玦玦叔父肱荅以女志不可奪冲為太守李嚴督郵
嚴記縣遣孝義掾奉羔雁宣太守命聘之玦乃自投水
掾援不死後太守蘇高為立表蜀郡太守遣仁恕掾論
曰貞玦太守章陵劉威又為作頌故稱述也

蜀中廣記卷四十一